

禮曹舉行祈禱之事與今頗相似然彼時皆屬二三月當下雨之時非如今時之太早也綏過雨水驚蟄日候弛暖而不雨則當祈祭于廟社及靈驗處今則日寒凍塞溝壑阡陌淨修之典亦不可為也自上深思致災之由特命中外有司審理冤獄另諭慶尚監司疏決久繫開釋民冤有合謹災之道聞全羅一道下雪倍舊而接壤隣道獨不下雪泉脉枯竭未知其故並啟傳曰禮曹所啟審理冤獄之意下書于慶尚監司○日有右珥夜木星與軒轅左角星相犯月暈

辛丑以金鎧為黃海道觀察使沈守慶為弘文館應教李戡為司憲府持平金明胤為同知中樞府事○日微暈夜異方如火氣

壬寅上視膳于文昭殿○日暈色內黃外青夜東南西方如火氣月微暈兩珥

癸卯上視膳于延恩殿○以賑恤廳事目傳于政院曰觀此事目使僧不得出入雖僧人豈無出入處乎巫覡亦是習俗